

## Rapport dalla presidenta dil cussegl Pastoral 2019

La s. Messa cun s. Ieli ha giu liug ils 26.02.2019. Sco mintg`onn havein nus astgau ir suenter messa egl Ischi per caffè e petta. Ad Otti e Mariane in engraziel fetg persunter.

Alla radunonza generala dalla pleiv havein nus priu cumiau da nies president Serafin Rensch. El ha susteniu e segidau duront 12 onns il cussegl pastoral. A Serafin ed era a sia dunna Marlise in grond engraziament per tut la lavur prestada. Sco sucesur vegn Pieder Decurtins elegius. Ad el bia curascha per siu niev post sco president dalla Pleiv da Trun.

Dumen`gialva han 6 affons astgau festivar la fiasta dall`emprema s. communiun.

Las perdanonzas han giu liug pli u meins da bial`aura, aschia che havein saviu far ils apperitivs.

Il di dalla mumma havein nus festivau 60 onns pastoraziun da sur. Cathomas. Aschia che havein astgau guder quei di da fiasta tier in apero cun la collaboraziun dalla musica.

Ils 18 d`uost essan nus semess sin viadi da nies pelegrinadi a Nossadunnaun, 43 persunas han dau suatientscha a nossa invitaziun. Quei ha fatg grond plascher. Cun auto da posta essan nus semess sin viadi da fina bial`aura. Allas 11 :00 uras havein nus giu la sontga messa cun conzelebrazion da nies plevon Sur Thomaz. Silsuenter havein nus astgau guder in bien gentar. Il program da suenter miezdi ha continuau cun la Dia Vision ella Alte Mühle, nua la historia e la veta claustrala vegn declarada. Silsuenter ha mintgin astgau encurir ora tgei program far. Ina pusseivladad era la tratga da cavals e spassegiar la via da S. Benedetg. In `autra varianta la Diorama da Bethlehem ni la crusch cuolm Golgota. Suenter in di plein variaziun essan nus semess intec staunchels encunter casa. Nus havein gudiu in bi di da cumpignia.

Duas jamnas pli tard essan nus ir sin viadi cun nos ministrants. Cunquei che nossa calustra Gabi ha giu il cletg da gudignar bigliets da Kino, essan nus ira a Cuera cul tren per mirar il film « König der Löwen ». Cun 24 affons els tren eisi stau nuot dat esser ruasseivel el car. Tuts han gudiu la cumpignia ed il bi film cun magliar popcorn ni autras bienas.

Il di da suppa ha giu liug ils 10 da November. Cun premura havein nus pinau tier la suppa cugl agid dalla Beni dil Tschutt. A tut tgi che ha gidau a preparar igl uorden pil di da suppa in grond engraziel fetg. Plitost pauca glied han priu la peda da tedlar igl interessant referat dalla Rita Furger. Nus sustenin quella gada la casa d'orfens Maria Nagar a Kerala ell'India. Cun la biala summa da 2500 francs sustenin nus ils affons dalla India.

Jeu less engraziar a tut mes collegas dil cussegl Pastoral. Duront il temps da miu uffezi da 6 onns hai astgau guder in grond sustegn dat els. Era al president dalla Pleiv Pieder Decurtins sco era alla suprastonza in grond dieus paghi per la collaboraziun. Naturalmein lessel jeu engraziar fetg a nies augsegner Sur Tomaz per la fetg buna collaboraziun sco era siu sustegn en tut las sfidas che havein manischau ensemen. Igl ei stau bi ed fetg interessant da luvrar ensemen cun vus. Jeu giavischel bia plascher e forza a mia sucesura l'Issabell per la lavur che suonda.

Cun salids, vossa presidenta